

80 000 sottascripziuns per ils avieuls

Greenpeace ed apiculturs han inoltrà petiziun

■ (anr) Greenpeace Svizra ha surdà gievgia ensemen cun apiculturs a las autoritads a Berna ina petiziun per proteger ils avieuls. Passa 80 000 persunas han sottascribt quella petiziun.

La petiziun pretenda il stop immediat dal diever da pesticids en l'agricultura. En vista a la muria d'avieuls èsi a l'avis dals represchentants da Greenpeace urgentamain necessari d'agir. Sch'ils avieuls mancan per impollinar las plantas na fa quai sco ch'els han ditg donn betg mo a l'ambient, mabain er a la produziun da vivondas. Ils motifs principals per la muria dals avieuls sajan baingea parassits, spazis vitals che vegnian adina pli pitschens sco era la basa genetica da l'avieul. Però era l'agricultura che fa grond diever da chemia gioga ina rolla, scriva l'organisaziun per la protecziun da l'ambient en ina comunicaziun.

Moratori u stop immediat

Oriundamain aveva pretendì Greenpeace in moratori da diesch onns per las substanzas clotianidin, imidacloprid, tiametoxam e fipronil. En vista a novas scuvertas scientificas ha midà l'organisaziun durant il ramassar las sottascripziuns il text da petiziun e pretais il stop immediat d'utilisar questas substanzas.

Tenor Greenpeace mussan diversas studias che gia pitschnas dosas da quests meds hajan per consequenza ch'ils avieuls survegnian problems cun sgular e tar la navigaziun. Enpli reduceschian las substanzas tant la capaciad da sa multiplitgar dals avieuls sco era da chattar il pavel, argumentescha Greenpeace.

Cumissiun da l'UE cusseglija scumond

Dals privels dals insecticids avertescha era l'Autoritad europeica per vivondas segiras. La cumissiun da l'UE ha cusseglià dacurt da renunziar dad utilisar trais da las substanzas contestadas, per entant per dus onns. L'UE vul decider proximamain en chausa. En Svizra ha communitgà l'Uffizi federal per agricultura ch'ins persequiteschia la discussiun. Il concern svizzer per agrochemia Syngenta dentant ha avertì ch'igl existia il privel da damain entradas per ils purs.

En in rapport da l'october passà era vegnì il cussegl federal a la conclusiun ch'in scumond na saja betg necessari. Per ina meglra protecziun dals avieuls s'engascha era Markus Imhoof, il reschissur dal film documentar «More than Honey». En ina charta al minister d'agricultura Johann Schneider-Ammann che Imhoof ha scrit en occasiun da la surdada da la petiziun accentuescha il reschissur: «Cunquai ch'ils avieuls nun han nagina atgna vusch stuain nus umans ans engaschar per els – era en noss interess.»



L'organisaziun Greenpeace ed apiculturs han surdà lur petiziun cun 80 000 sottascripziuns.